

## Euruopietē

Sosētēka Jorgis Mēkē,  
Patapšnuojē anam par plēkē:  
„Ēkiau, bruoli i restorana,  
Ēšlēnksiau po taurē šampana.“

Opa, opa ož Euruopa!..  
Šīpsuos vīrā, kel tuosta:  
Mes jau esam euruopietē,  
Ēš vakarū saulelē švēit jau!

Karviu mēlžtē nebreikies –  
Eurā opiemis tekies.  
Smiltis Palonguo žarstīsem  
Ē juokē varga nebmātīsem.

Dešrū, sūriu iki valēs,  
Alaus, vīna kobēlā,  
Mašīnelē tēk pasoksi –  
Krēs svēista gabalā.

Laukā krūmās viel apžels,  
Zoikē vestovēs čē kels...  
Pēivas, lonkas ožpelkies,  
Pēmpēs vaikelius peries...

Saka, nebrēks nē kapiniū –  
Veš i dongo so traukēniu:  
Je kam gīventē apkīries –  
Atsisies ē nodardies...